

FILED

SEP 11 2023

ASSISTANT CLERK OF COURTS
REPUBLIC OF THE MARSHALL ISLANDS

**IN THE TRADITIONAL RIGHTS COURT
OF THE
REPUBLIC OF THE MARSHALL ISLANDS**

AMIMA ALIK, Riabnono, vs. YOSEPH KINTARO, Rijumae Abnono.	CIVIL ACTION NO. 2022-021 KAJJIMWE IN LOMNAK IM UAAK EO/KO AN TRADITIONAL RIGHTS COURT EO
--	--

RO UAAN PANEL EO : Hon. Grace L. Leban
Presiding Judge, TRC

Hon. Nixon David
Associate Judge, TRC

Hon. Claire T. Loeak
Associate Judge, TRC

JKIN RONJAKE EO : Majuro Courthouse
Uliga, Majuro Atoll
Marshall Islands

RAAN IM AWA EO : June 6-8, 2023; July 24, 2023
10am

IAKWELEL KO IKOTAAN PARTY KO:

Iakwelel kein an party kein ruo ej ikijen Enbar Weto ilo Toka, Ebon Atoll, Marshall Islands. Party kein ruo rej jimor erra bwe Enbar weto ej juon Imon Aje nan Binikio jen Phillip. Riabnono Amima Alik ej ba bwe ejimwe im jejjot bwe e eo ej kabjor maron eo an Alap ion Enbar Weto einwot ke ej jolet jen jinen, Mita, eo edriklok jen Binikio. Ekkar nan melele ko an Riabnono Alik, ej ba bwe mokta jen an Binikio jako ear aje lok Enbar nan lellap eo jinen, Nelle

eo jinen, Mita, innem ejimwe im jejjot bwe en e eo ej bok maron eo an Alap ion Enbar Weto rainin einwot ke ej juon imon bwij. Riabnono eo ej bareinwot kile bwe ear wor nejin Binikio, nae etan Taupe, eo ewor ro nejin rej mour wot nan rainin. Im bwe rein nejin Taupe enkar er eo rej kabjor maron eo an Alap ion Enbar rainin, ak itok wot jen aer bed tok wot ilo Jobat im Ailinglaplap, im einwot ke rej kile Riabnono Alik, innem Alik ej e eo ej kabjor maron an Alap ion Enbar Weto, Ebon Atoll.

Rijumae Abnono Yoseph Kintaro ej ba bwe e eo ekkar im jejjot bwe en kabjor maron eo an Alap ion Enbar Weto ilo Toka, Ebon Atoll, Marshall Islands. Ekkar nan Rijumae Abnono Kintaro, Binikio ear aje lok Enbar Weto nan lellap eo jinen, Milka, elkin an kar lale im kauki ilo juon tore eo ear aitok. Kin menin, ekkar nan Rijumae Abnono Kintaro, Enbar Weto ej imon aje nan jinen im ro bwijin wot im jab ro ilo bwij eo. Kin menin, ej bar ba bwe elkin an Milka jako, innem ejimwe im jejjot bwe en e eo, ak Rijumae Abnono eo, en etal maron eo an Alap ion Enbar Weto rainin.

KAJITOK EO KAR LETOK NAN TRC PANEL EO BWE EN UAAKE:

Ikotaan Amima Alik im Yoseph Kintaro, won eo ejimwe im jejjot bwe en kabjor maron eo an Alap rainin ilo Enbar Weto, bukon in Toka, Ebon Atoll, Marshall Islands.

UAAK NAN KAJITOK EO:

Yoseph Kintaro.

MELELE KO IM UAAK IN EJ BEDBED IOON:

Ekkar nan naan in kebellok ko an Riabnono Amima Alik, ej ba bwe Enbar Weto ear imon juon alap nae etan Ibo. Elkin Ibo ear kejolet kora eo nejin, Limij kin maron eo an Alap ion Enbar Weto. Limij ear kitdreik Enbar Weto nan leo ibben, Phillip, eo ear Alap in Enbar Weto elkin Limij. Tokelik Phillip ear lelok Enbar Weto nan leo mandren, Binikio einwot juon *Imon Aje* kin

an kar lale im kauki Phillip ilo juon tore. Binikio ear Alap nan Enbar Weto. Ilo juon tore, Binikio ear emakit nan Jaluit im ear lelok Enbar Weto bwe lellap eo jinen, Nelle, en lale. Binikio ear jako mokta jen jinen. Elkin an Binikio jako, Nelle ear wonmanlok wot im kabjor maron eo an Alap ion Enbar Weto im ke ear jako, kora eo nejin, Mita, ear bok jikin. Riabnono Amima Alik, ej ba bwe einwot ke emoj an jako jinen, Mita, im einwot ke e wot nejin Mita e mour rainin, innem ejimwe bwe en etal maron eo an Alap ion Enbar Weto nan e.

Rikamol Susan Alik, eo ear kamol nan Riabnono eo, ear kwalok an rie laajrak in jolet eo einwot an Riabnono eo ba im einwot an walok ilo Plaintiff's Exhibit 1, bwe jen Ibo, ear wonlaltak maron eo an Alap nan rainin im ejimwe bwe lollap eo jemen, Riabnono Amima Alik, en e eo ejimwe bwe en Alap ion Enbar Weto.

Ilo naan in kamol ko an Riabnono eo, ear ba bwe ear wor juon nejin Binikio kora, nae etan Taupe, eo ear wor bar nejin, im ejimwe bwe er eo ren kar kabjor maron an Alap ion Enbar Weto, botab kin aer kar lotak im ritto lok wot ion Jobat im Ailinglaplap im ilo aer jab komman aer abnono nae Enbar Weto, ej wonmanlok wot ilo etaeor jimor. Ear bareinwot ba bwe Leroij Neimat Reimers ej erra ibben einwot an kar Iroij Jimata, eo ej maan maronron nan Leroij Neimat, sign i juon pepa in karon (*Plaintiff's Exhibit 3*), bwe ej kajej tokjen paper eo im ear kotlok Komi, leo nejin Rijumae Abnono Kintaro, bed ion Enbar Weto. Riabnono eo ear kadrelon tok juon kalimur (*Plaintiff's Exhibit 2*), im kwalok an jab erra kin elon ian melele ko ilo kalimur in im jet ian eltan pein ro rar sign im kabine kalimur in, ijowotke ear erra kin jet ian melele ko im bareinwot kwalok an kile eltan pein Irojlaplap Kabua Kabua im eltan pein Community Court Judge eo ilo Ebon tore eo ear komman kalimur in. Riabnono eo ej ba bwe armij eo im ear sign i kalimur in einwot juon Alap, Nathan Jokaidrik, ear jab juon alap in Enbar Weto.

Ikijen kein kamol Plaintiff's Exhibit 4, Riabnono ej ba bwe melele ko ilo kar case in rej kalikar bwe Nelle ear juon Alap ion Enbar Weto. Bareinwot, ekkar nan Riabnono eo, Binikio ear komman an kalimur bwe Enbar en etal nan lellap eo jinen Nelle, innem jinen Riabnono eo, ijowotke kalimur in ear komman wot ilo naan in jab ilo jeje einwot ke ilo tore ko, ekka aer komman kalimur ilo naan wot im jab ilo paper. Riabnono eo ej ba bwe ear wor jilu (3) Alap rikamol ro im rar bed ijo ke Binikio ej kommane kalimur eo an. Ilo naan in kamol ko an Riabnono eo, ej ba bwe elkin an kar etal maron eo an Alap jen Nelle nan lellap eo jinen, Mita, innem laajrak in jolet ear wonlalok iumin bwij. Kin menin, einwot ke e eo eliktata nejin Mita emour rainin, ej e eo ekkar im jejjot bwe en jolet maron eo an Alap ion Enbar Weto. Bareinwot rikamol Antonia Korn, ear ba ilo naan in kamol ko an bwe einwot juon ian ro nejin Taupe eo nejin Binikio, ej kile lollap in wulepen, Amima Alik, einwot juon an Alap rainin ilo Enbar Weto.

Melele ko an Rijumae Abnono Yoseph Kintaro rej kwalok bwe ejimwe im jejjot bwe Rijumar Abnono Kintaro en kabjor maron eo an Alap ion Enbar Weto einwot an kar jolete jen jinen Milka. Ekkar nan Rijumae Abnono Kintaro, Binikio ear lelok Enbar Weto nan Milka einwot juon imon aje itok wot jen an kar Milka emman an lale Binikio ilo an kar naninmij im ejelok armij turin nan lale im kauki. Rijumae Abnono eo ear bar kadrelontok kein kamol Defendant Exhibit 2, ak Plaintiff's Exhibit 2, eo im watoke ej juon kalimur jen Binikio nan Milka ikijen maron eo an Alap ion Enbar Weto. Ikijen kein kamol eo an Riabnono, Plaintiff's Exhibit 4 (*CA 183: Memorandum of Pre-Trial Conference*) eo Riabnono eo ej ba bwe ej juon kamol nan kalikare bwe Nelle ear kabjor maron an Alap, botab Rijumae Abnono eo ear kajij tokjen ilo an kar kadrelon tok kein kamol, Defendant Exhibit 5 (*CA 183: Order of Dismissal*) ilo an ba bwe Court ear jolok case in im ear ejelok jemlokin. Rijumae Abnono Kintaro ear ba ilo naan in kamol ko an bwe ear ejelok nejin Binikio, ijowotke Riabnono ear kadrelontok pepa in

lotak eo an Antonia Korn (Plaintiff Exhibit 5) nan jumae melele kein an Rijumae Abnono Kintaro.

Bedbed ion aolep kein kamol kein ilo case in, panel eo ej kile bwe kein kamol Plaintiff Exhibit 2 eo im ej bareinwot Defendant Exhibit 2, ej juon kamol eo elap kilan nan an court in kile bwe Enbar Weto ear juon imon aje jen Binikio nan Milka, eo im Rijumar Abnono Yoseph Kintaro ej jolet jene. Party kein jimor rej erra bwe kalimur in ewor eltan pein Irojlaplap Kabua Kabua, eo ear Iroj nan Enbar Weto ilo tore eo, ekoba eltan pein Community Court Judge eo ilo aelon in Ebon ilo tore eo. Ilo naan in kamol ko an Susan Alik im tokelik Riabnono Amima Alik, rej ba bwe rejjab erra kin jet ian melele ko ilo kalimur in im rejab bar erra kin jet ian eltan pa kein rar sign i kalimur in. Ijowotke rej kile jet ian armij rein rar sign, einwot Irojlaplap Kabua Kabua im Judge eo an Ebon tore eo, im rej erra ilo jet ian melele ko walok ilo kalimur in. Panel eo ej tomak bwe elane rej ba rej erra kin jet ian melele kein im jet ian eltan pa kein, melelein bwe Kalimur in nae etan “History Eo An Enbar Weto” ej juon kein kamol eo ejimwe im jejjot bwe Panel eo en kile.

Kin menin, Panel eo ej loe bwe ear wor an Yoseph Kintaro kalimur botab ear ejelok an Amima Alik. Riabnono Alik ej ba bwe ear etal kalimur nan e ilo naan im jab ilo jeje einwot eo an Rijumae Abnono Yoseph Kintaro, im mekarta, ak ej ba bwe ewor, ak ear komman ilo naan wot.

Ekkar nan manit, ewor ruo wawen ko im laajrak eo ilo juon menmenbwij enaj etal im oktak. Eo kein kajuon ej elane ear wor bwilok ak lia, im eo kein karuo elane ear wor kalimur, eo im ro rekkar ilo tore eo ej komman rej likit eltan peier ie im ro rej bojak in bok title eo/ko, einwot an walok ilo case eo an *Malachi v. Abon*.

Ej alikar ilo case in bwe kein kamol Plaintiff's Exhibit 2 ak Defendant Exhibit 2, ej juon kalimur eo nan Milka jen Binikio ikijen maron eo an Alap ilo Enbar Weto. Im einwot ke ej juon Imon Aje, innem Milka im ro bwijin rej jolet im eo emour rainin ej Yoseph Kintaro. Kein kamol Defendant Exhibit 2 ej bar kamol nan Panel eo ke Irojlaplap Kabua Kabua ear erra kin aje lok in an Enbar Weto nan Milka ilo an kar dror eltan pein ilo kalimur eo. Ijelokin Irojlaplap Kabua Kabua, ear bar sign Community Court Judge eo Ebon ilo tore eo, ro rar kabjor maron ion Enbar Weto ilo tore eo im jet ian ro uaan Council eo an Ebon rar rikamol ilo kalimur in.

Panel eo ej bar kile bwe ijelokin an kar Irojlaplap Kabua Kabua erra kin kalimur in an Binikio nan Milka, Leroij Neimat Reimers, eo ej kabjor maron an Irojlaplap ion Enbar Weto rainin ear bar kwalok an loor wot ro lak mokta jene im kile kalimur in ak Plaintiff Exhibit 2 / Defendant Exhibit 2, im ear likit eltan pein ilo pepa in kile eo ear sign i ilo January 15, 2018 eo im ej kein kamol Defendant Exhibit 3.

Panel eo ear bar etale kein kamol eo an Riabnono eo, Plaintiff Exhibit 3, eo im Iroj Jimata Kabua ear sign i ilo etan Leroij Neimat Reimers. Elkin etale Plaintiff Exhibit 3, panel eo ej loe bwe ejabwe melele nan an kalikar elane Leroij Neimat ear melele kin Plaintiff Exhibit 3 einwot ke ejjab e eo ear sign ak ej maan maronron eo an, Iroj Jimata Kabua.

Bedbed ion aolep melele kein einwot aer laajrak ijin, TRC Panel eo ej kile bwe ejimwe im jejjot bwe Rijumae Abnono Yoseph Kintaro en kabjor maron eo an Alap ion Enbar Weto, Toka, Ebon Atoll, Marshall Islands, rainin.

MANIT IM IMINENE KO REJELET CASE IN:

- 1. Imon Aje – Juon jikin eo elelok in Iroj eo ak Alap eo nan juon eo ear lale im kojbaroke ilo tore eo ej ritto lok im mojno lok. Ro nejin ak bwijin eo ear etal aje in nane rej ro im rej jolet.*

2. *Imon Bwij – Ijo jikin bwij eo.*

KEIDI MANIT IBBEN MELELE KO REMOL:

Ej alikar ilo case in im party kein jimor rej erra bwe Enbar Weto ilo Toka, Ebon Atoll, Marshall Islands ej juon imon aje jen Phillip nan Binikio. Riabnono eo ej ba bwe Enbar Weto ej imon bwij. Aet, enaj kar imon bwij elane ear jab komman aje lok eo nan Milka jen Binikio ekkar nan Plaintiff Exhibit 2 / Defendant Exhibit 2, eo ej juon kalimur ikijen an kar Binikio aje lok Enbar Weto nan Milka kin an kar lale im kauki ilo tore eo ear jino mojno lok im ear weppen jen Irojlaplap Kabua Kabua im Alap Nathan Jokaidrik ilo aerro dror eltan peierro ie.

Ri Kamol ro an Riabnono:

1. Susan Alik
2. Antonia Korn
3. Amima Alik
4. Robin Reimers

Ri Kamol ro an Rijumae Abnono:

1. Yoseph Kintaro
2. Komi Kintaro

Kein Kamol ko an Riabnono:

1. Plaintiff Exhibit 1 – Menmenbwij
2. Plaintiff Exhibit 2 – History Eo An Enbar Weto ilo jeje
3. Plaintiff Exhibit 3 – Leroij Neimat Reimers’ January 2019 Revocation
4. Plaintiff Exhibit 4 – Civil Action 183
5. Plaintiff Exhibit 5 – TTPI Certificate of Birth – Antonia Korn

Kein Kamol an Rijumae Abnono:

1. Defendant Exhibit 1 – Menmenbwij
2. Defendant Exhibit 2 – History Eo An Enbar Weto ilo jeje
3. Defendant Exhibit 3 – Leroij Neimat Reimers’ January 15, 2018 Verification
4. Defendant Exhibit 4 – Menmenbwij an Andrew & Emle
5. Defendant Exhibit 5 – Civil Action 183, Order For Dismissal

WAWEN KO JET PANEL EO EJ LOE BWE REKKAR NAN AER WALOK:

Elane jenaj kar loor wot menmenbwij eo an bamle kein, innem ro bwijin Binikio im rej mour rainin, einwot Antonia Korn im ro jein im jatun enaj kar er eo rej kabjor maron in an Alapion Enbar Weto. Ilo aer kautej Amima Alik einwot juon eo wulapeor, rar kile im lelok bwe en wonmanlok wot kin case in ilo etaerwoj jimor.

Panel eo ej bar kile aurok eo an manit kein ad ilo nuking ko adwoj jen dron. Iakwe dron, jela nae dron im kautej dron ej wawen eo ej kabin im kojbarok manit ilo juon jukjuk im bed. Im einwot ke rein ilo case in rej juon wot, kotmene eo an Panel eo in bwe renaj kaurok manit in jej jeramon kake im iakwe dron, jela nae dron im kautej dron.

Dated: _____



Hon. Grace L. Leban
Presiding Judge, TRC



Hon. Nixon David
Associate Judge, TRC



Claire T. Loeak
Associate Judge, TRC